

TEZĂUR LITURGIC

29 SEPTEMBRIE

ACATISTUL SF. IERARH-MUCENIC IOAN POMER, ARHIEPISCOPUL RIGĂI ȘI ÎNTREGII LETONII



MOSCOVA, 2000



Акафист

священномученику Иоанну, архиепископу Рижскому и всея Латвии

Кондак 1

Избранный архиерею, предивный угодниче Христов, Церкви Православный крепкое ограждение, страны нашея ходатаю и заступниче, прославляя прославльшаго тя Господа, похвальное пение восписуем ти; яко же имеяй велие дерзновение ко Святей Троице, от всяких нас бед свободи, да зовем ти: Радуйся, священномучениче Иоанне, скорый помощниче и теплый к Богу предстателю.

Икос 1

Ангелов Творче и Владыко всех, восхотев Церковь Латвийскую в годину гонений сохранить и людем страждущим утешение даровати, предъизбра, освяти и постави тя, святителю Иоанне, архипастыря и

проповедника Правды отечеству твоему, мы же
вопием ти:

Радуйся, земли Латвийския прозябение
святое;

радуйся, родителей благочестивых отрасль
пречестная.

Радуйся, добродетели родителей твоих
унаследивый;

радуйся, послушанию и трудолюбию ими
наученный.

Радуйся, от юности разум совершенный
явивый;

радуйся, измлада Христа возлюбивый.

Радуйся, вся заповеди Господни непорочно
сохранивый;

радуйся, велий плод духовный о Христе
сотворивый.

Радуйся, священномучениче Иоанне, скорый
помощниче и теплый к Богу предстателю.

Кондак 2

Виде суету мира сего тленнаго, всем сердцем
возжелел еси, отче Иоанне, мир сей оставить и
во иночестве Богу и Церкви послужити.

Благословением же и молитвами святого праведного Иоанна Кронштадтского утвержденный, усердно восприял сие благое и легкое иго Христово, воспевая Творцу всех ангельскую песнь: Аллилуиа.

Икос 2

Разум богопросвещенный твой виде, Владыка Господь благоволи поставити тя начальника в вертоградех духовных, да православныя отроки Богомудрию и христианскому благочестию научиши, соблазном же богоборчества колеблемых в разуме церковнем утвердиши. Мы же, от словес твоих и ныне вразумляеми, вопием ти сице:

Радуйся, светильниче всесветный;

радуйся, проповедниче изящный.

Радуйся, истинного богословия златословесный учителю;

радуйся, юных добрый наказателю и попечителю.

Радуйся, страх Божий и начало премудрости в сердцах пасомых насадивый;

радуйся, праведныя жизни образ верным показавый.

Радуйся, яко твоим к Богу молением от врага оградивый;

радуйся, твоим предстательством на путь спасения возставляяй.

Радуйся, священномучениче Иоанне, скорый помощниче и теплый к Богу предстателю.

Кондак 3

Сила благодати Божия осени тя, отче Иоанне, егда святитель Михаил, болезнию отягчен, возжела имети тя помощника себе в трудах апостольских. Темже, собор святителей возведе тя, блаженне, в сан епископский в Лавре святого благоверного князя Невскаго Александра. Ты же жезл архипастырский, яко крест приял еси, к подвигу ради Христа себе уготовляя и поя избравшему тя Богу: Аллилуиа.

Икос 3

Имея в сердце своем огонь любви Божественныя, спасения ради душ человеческих пастырски подвизался еси, святителю Иоанне, на кафедрах богоспасаемых градов Таганрога, Твери и Пензы. Егда же Божиим попущением прииде на Церковь гонение лютое, мужески противостал еси врагом Христовым, начало

исповедничеству своему полагая. Сего ради
песньми похвальными ублажаем тя сице:

Радуйся, Церкви Христовы избранный
служителю;

радуйся, ересей, смут и неправды
искоренителю.

Радуйся, апостолом поревновавый;
радуйся, сосуде Духа Святаго.

Радуйся, злострадания темничная за Христа
претерпевый;

радуйся, о заблуждших от пути истиннаго
много скорбевый.

Радуйся, милосердия и долготерпения
учителю;

радуйся, сущим в бедах скорый помощниче.

Радуйся, священномучениче Иоанне, скорый
помощниче и теплый к Богу предстателю.

Кондак 4

Буря гонений от богоборцев возшуме на тя,
богомудре Иоанне. Ты же, слыша в сердце твоём
глагол Господень: блажени есте, егда поносят вы
и ижденут, и рекут всяк зол глагол на вы лжуще
Мене ради, в радости духа, пред судиями

неправедными Христа мужески исповедал еси, и темничное заключение, уничижение и на смерть осуждение без ропота претерпел еси, жизни вечныя взыскуя. Ныне же со всеми святыми поеши Богу: Аллилуиа.

Икос 4

Слыша о тебе, святителю Иоанне, православнии людие земли твоея отеческия и ведяще тя, яко святителя богоносна и пастыря премудра, просиша Первосвятителя Тихона отпустить тя на кафедру града Рижскаго, волнами нестроений обуреваемую, да идеже рожден еси плотию, тамо и духовную паству обрящещи от Пастыреначальника Христа. Мы же в сем волю Божию уразумевающе, вопием ти таковая:

Радуйся, утешение всех градов и весей, иже сподобишася тя видети и о тебе благословитися;

радуйся, всего себе принесша в жертву живу, святу и благоугодну Богови.

Радуйся, правды ревностный блюстителю;

радуйся, благолепия церковнаго усердный рачителю.

Радуйся, паству твою молитвенно назираяй;

радуйся, с верою к тебе притекающих
прошения исполняяй.

Радуйся, пасомых хранителю неотступный;
радуйся, всея Латвийския земли предстателю,
Богом данный.

Радуйся, священномучениче Иоанне, скорый
помощниче и теплый к Богу предстателю.

Кондак 5

Боготечной звезде, возсиявшей на тверди
церковней, подобен был еси, досточудне отче
наш Иоанне, егда смотрением Божиим
поставлен был еси на святительском престоле
Церкви, являя в себе образ мужа совершенна,
дарами благодати Духа, добродетельми и
исповедничеством украшена. Православнии же
людие таковое о них Промышление Божие
зряще, с радостию велиею сретяху тя,
благодарно поюще: Аллилуиа.

Икос 5

Внегда поставлен был еси, богомудре отче
Иоанне, на свещнице служения святительскаго
земли отеческия, потщался Церковь
православную, ветром гонений колеблемую,
сохранити и утвердити; и востину не вотще

подвизался еси, яко трудами твоими и ныне живем и движемся и есмы. Сего ради ублажаема ты, зовуще:

Радуйся, у кормила Церкви твердо стоявый;
радуйся, свет Христов верным возсиявый.

Радуйся, душетленному зверю стадо твое расхищати не попустивый;

радуйся, Церковь, в гонении сущую, верной Христу сохранивый.

Радуйся, иерарше мудрый и благодатный;

радуйся, правды Божия проповедниче велегласный.

Радуйся, делателю винограда Христова неленостный;

радуйся, молитвенниче о пастве твоей неусыпный.

Радуйся, священномучениче Иоанне, скорый помощниче и теплый к Богу предстателю.

Кондак 6

Проповедник словес Евангельских: еже не скривати себе сокровищ на земли, не словом точию, но и делом явился еси, святителю отче наш Иоанне, егда в подклете каменнем

соборнаго храма Рождества Христова, аки в пещере, в тесноте и скудости подвизался еси, смирением высокая стяжавый и нищету иноческую соблюдый. Ныне же в чертозах Небесных со Ангелы ликуеши, поя Богу: Аллилуиа.

Икос 6

Возсия земле нашей всерадостный свет добродетелей твоих, святителю отче Иоанне; труды ко трудом прилагая, паству твою неленостно поучал еси в истинней вере пребывати и заповеди Господни хранити. И ныне светом богомудрых поучений твоих озаряеши души верных, вопиющих ти таковая:

Радуйся, светильниче Божественнаго света;
радуйся, молитвы благовонное кадило.

Радуйся, верных непреложное утверждение;
радуйся, неверных богомудрое обличение.

Радуйся, апостольских преданий верный хранителю;

радуйся, Тайн Божиих истинный строителю.

Радуйся, яко молитвами твоими козни вражия низлагаются;

радуйся, яко ходатайством твоим болящия исцеляются.

Радуйся, священномучениче Иоанне, скорый помощниче и теплый к Богу предстателю.

Кондак 7

Хотение едино имел еси, святителю Христов, яже Богу благоугождати и спасению людей твоих служить. Ты же, красоту церковную возлюбив, о устроении и обновлении храмов святых, безбожною властью разоренных, и о благочестии всеусердно прилежал еси. Подаждь и нам, святителю Божий, благодатныя силы неленостно Богу работати и Церкви Святей неустанно служить, да вкупе с тобою сподобимся пети Господу Сил: Аллилуиа.

Икос 7

Новаго тя апостола и дивнаго строителя Церкви Латвийския вемы, святителю отче Иоанне, яко во дни смуты и разделений, благовествовал мир дальним и ближним: поучая, яко во Христе Иисусе несть иудей, ни еллин, но вси едино есте. Сего ради помози и нам, грешным, единство духа в союзе мира имети, да совокуплени любовию, тебе поем:

Радуйся, смятенных сердец умирителю;
радуйся, смирения и терпения учителю.

Радуйся, начальствующим правления мудраго
образ;

радуйся, архиереев православных похвало.

Радуйся, любовью твоею разделенная
примираяй;

радуйся, незлобием твоим строптивыя сердца
покоряяй.

Радуйся, отче благосердый, о спасении
многих поревновавый;

радуйся, не своих си, но ближняго искавый.

Радуйся, священномучениче Иоанне, скорый
помощниче и теплый к Богу предстателю.

Кондак 8

Велию ревность о святей правде имей,
преблаженне, противостал врагом Христовым;
огненная словеса испущаяй, хитросплетения
богоборцев разрушил еси, заблудшия на путь
истины наставил еси, Церковь Православную от
клеветы и поношений оградил еси. Сего ради и
мужем борьбы от Патриарха Тихона наречен

был еси. Мы же, зряще таковыя труды и подвиги твоя, со удивлением вопием о тебе: Аллилуиа.

Икос 8

Весь в Бозе быв, дар любви божественныя стяжал еси, в ней бо милость и истина сретостеся, правда и мир облобызастеся, скорби же человечестии елеем милосердия твоего утолишася. Мы же, нерадивии, многим печалем и недугом достойни явихомся, ведище тя помощника неусыпна, умиленно вопием ти:

Радуйся, всех скорбящих и обремененных заступниче;

радуйся, болящих и от нечистых духов страждущих благодатный врачевателю.

Радуйся, нищих кормителю и алчущих питателю;

радуйся, сырых защитниче и обидимых предстателю.

Радуйся, в море житейстем обуреваемых тихое пристанище;

радуйся, яко душевне и телесне изнемогающим о помощи к Богу ходатаю.

Радуйся, спасительных благ земных и небесных щедрый подателю;

радуйся, от враг видимых и невидимых надежный избавителю.

Радуйся, священномучениче Иоанне, скорый помощниче и теплый к Богу предстателю.

Кондак 9

Всем, в гонениях и напастех сущим, образ долготерпения и мужества явился еси, святителю отче наш Иоанне. Правду Божию защищая, столп злобы богопротивныя обличил еси, скорби и клеветы приемля: беззаконных соборище, не могуще заградити праведная уста твоя, тайно ковы деяху, погубити тя поучахуся. Ты же, на Господа упование возложив, вопиял: Аллилуиа.

Икос 9

Ветия многовещанная не возмогут по достоянию изрещи твоего к падшим милосердия, святителю Божий, ибо многожды от людей злых нападения и скорби претерпевая, не ожесточил еси сердце твое. Егда же неции от них впадаху в рuce твоя, ибо крепостию телесною и велиею силою от Бога наделен быв

еси, тыя спасительне наказуя и, кающияся, с любовью принимал еси. Поминающе убо таковое твое к согрешающим благоснизхождение, вопием ти сицевая:

Радуйся, в кротости и смирении твоём Христу Богу подражавый;

радуйся, незлобием твоим духа злобы победивый.

Радуйся, крепкаго терпения адаманте;

радуйся, совершеннаго мужа образе.

Радуйся, воине Христов непоколебимый;

радуйся, Крест Христов во оружие победы приемый.

Радуйся, яко состраданием твоим скорби и печали наша утоляяй;

радуйся, яко молитвами твоими кающияся грешницы Царствию Небесному приуготовляются.

Радуйся, священномучениче Иоанне, скорый помощниче и теплый к Богу предстателю.

Кондак 10

Спасительнаго твоего подвига скончание предзря, святителю Христов Иоанне, всего себе

в руке Божии предал еси, надежду спасения своего на Него Единого возлагая. Ибо умножившимся врагом твоим, ближнии твои отдалече тебе сташа. Ты же, блаженне, жертвенною любовью Подвигоположнику нашему Иисусу Христу последуя, возшел еси на голгофу страданий твоих, взывая победную песнь: Аллилуиа.

Икос 10

Стена тверда бысть вера и любви твоя ко Господу, богоносне отче наш Иоанне, в ней же утвердися сердце твое, егда людие нечестивии, разум помраченный неверием имеяху и злобою дышуще, нощию в дому твоём руке убийственная на тя возложивше, биением и ранами уязвляху и огнем опаляху многострадальное тело твое, яко не быти на нем места цела и неуязвлена; обаче мужества души твоя поколебати не возмогоша. Дивящися убо величеству терпения твоего, зовем ти:

Радуйся, страданием исповедание совершивый;

радуйся, крове обагрением ризу твою святительскую украсивый.

Радуйся, со мученики в радость Господа твоего вшедый;

радуйся, имя Христово кончиною твоею прославивый.

Радуйся, за овцы твоя словесныя душу свою положивый;

радуйся, град наш Ригу изливанием крове Твоея освятивый.

Радуйся, и по смерти любящих и чтущих тя не оставивый;

радуйся, о спасении нашем Бога выну умоляяй.

Радуйся, священномучениче Иоанне, скорый помощниче и теплый к Богу предстателю.

Кондак 11

Пение Пресвятей Троице паче иных воздал еси, священномучениче Иоанне, не словом точию и умом, но живым всего себе в жертву принесением; подражая бо распятому за ны непорочному Агнцу Христу, положил еси душу за паству твою; огнем бо всесожжегся, во обители горняя душею возшед, со Ангелы поеши Богу: Аллилуиа.

Икос 11

Светозарную свещу во мраце жития сущим,
зрим тя, Богом прославление, отче наш Иоанне,
ты бо победоносно путь страданий прошел, от
Христа увенчался еси. И ныне на Небесех, у
Престола Божия, в сонме святых о нас присно
ходатайствуеши. Мы же, земнии, по достоянию
прославить тя не могуще и недоумением объяти
бывше, вопием ти:

Радуйся, о тебе же возрадовашеся Ангели;
радуйся, емуже удивишася человецы.

Радуйся, коварства вражия обличителю;
радуйся, слуг адовых посрамителю.

Радуйся, по Бозе и Пресвятей Богородице все
наше упование;

радуйся, во юдоли сей земной наше
утешение.

Радуйся, мученическаго пресветлаго собора
сияющая звезда;

радуйся, Церкви Христовой дивное
украшение.

Радуйся, священномучениче Иоанне, скорый
помощниче и теплый к Богу предстателю.

Кондак 12

Благодать велию и щедрот обилие яви
Человеколюбец Господь Святей Церкви нашей,
яко дарова нам тебе, чудотворца новаго и
молитвенника богоприятнаго, чудес благодать
источающа и недуги наша врачующа. Темже
благодарим тобою благодееющаго нам Господа и
раку мощей твоих соборне обстояще, с любовью
к ним притекающе и Христу зовуще: Аллилуиа.

Икос 12

Поюще подвиги твоя, священномучениче
Иоанне, и святых мощей твоих нетленных
обретение, поминаем, яко еще ти живу сущу
изрек еси желание: по кончине своей быти
погребенным в убозей своей пещере в подклете
соборнаго храма. Ныне же познахом, яко сими
словесы предрекл еси славное свое прославление
и в собор пренесение. Сего ради со умилением
вопием ти:

Радуйся, Пресвятая Троицы верный
исповедниче;

радуйся, Пречистая Богородицы достойный
избранниче.

Радуйся, Ангельских воинств собеседниче;

радуйся, всех святых свойственниче.

Радуйся, жертва Богу благоуханная;

радуйся, со славою и честью во храме
Божием положенный.

Радуйся, нетлением прославленный;

радуйся, за подвиги твоя на Небеси
венчанный.

Радуйся, священномучениче Иоанне, скорый
помощниче и теплый к Богу предстателю.

Кондак 13

О, великий угодниче Божий,
священномучениче Христов Иоанне, Церкви
Христовой пресветлый светильниче и теплый о
нас к Богу молитвенниче! Приими сие хвалебное
пение и умоли Христа Бога нашего Церковь
Святую в мире и благочестии сохранить, нам же
от всяких бед избавиться и Небеснаго Царствия
сподобиться, да с тобою на земли живых
воспоем Богу: Аллилуиа.

(Этот кондак читается трижды)

Молитва

О, всеблаженне святой священномучениче
святителю отче наш Иоанне, правды Божия

поборниче и святыя православныя веры Христовой защитниче, хулителей Святыя Церкви обличителю, врагов прогонителю, обидимым покровителю и всех верных христиан теплый предстателю. Ты всею душою от юности заповеди Христовы возлюбил еси. И во дни гонения лютаго на веру Православную, яко истинный пастырь явился еси, крестный путь прошел: поругание, заточение, оклеветание претерпевый и тако мученический венец восприял еси, обретши благодать Господу молитися за ны. Ве мы, яко ты, предстоя Престолу Вседержителя, имаши велие дерзновение в молитвах пред Господем. И ныне смиренно припадаем и усердно молимся: о, скорый заступниче наш, святителю священномучениче отче Иоанне, услыши нас грешных и недостойных чад твоих: умоли Всемилостиваго Господа и Пречистую Его Матерь Пресвятую Богородицу веру православную соблюсти, Святую нашу Церковь укрепить в единстве мира и любви, отпадшия от Святыя Церкви паки возвратити, страну нашу Латвийскую в мире, христианских добродетелех и благоденствии сохранить. Помози нам и разум наш питати не суетною мудростию

человеческою, но смиренным познанием воли Божия. О, святой угодниче Божий, не презри нас молящихся тебе: не токмо от бед и скорбей избавления просим, но силы и твердости, великодушия и любви, дабы претерпети оныя напасти восстающия на ны. Испроси нам неослабное терпение до конца жития нашего, мир с Господем и грехов наших прощение. Ей, святой священномучениче, моли Господа Бога и Спаса нашего Иисуса Христа Сына Божия избавитися нам от всякаго зла и сохранить храм сей, и град, и страну нашу, и люди благочестно чтущия тя от всякия напасти, от болезней, глада, потопа, огня, меча, нашествия иноплеменников и междоусобных брани, от клеветы и всякаго злаго обстояния. Молитвами твоими святыми рассеянных собери, заблудших на путь правый настави, старость поддержи, юныя вразуми, младенцы воспитай и всех нас с любовью почитающих тя утверди, да пребудем в любви друг ко другу, единомысленно исповедуя Отца и Сына и Святаго Духа, Троицу Единосущную и Нераздельную, и тако да сподобимся Небеснаго Царствия, идеже славится Пречестное и Великолепое Имя

Пресвятой и Живоначальной и Нераздельной
Троицы. Аминь.

